



EDITORIAL

Waray tubtuban nga kapalpakan ni Duterte

Samtang natikaila an pandemya nga Covid-19, natikahilaba liwat an listahan han mga kapalpakan han rehimen Duterte. Paglabay hin haros duha katuig nga panlasurbo hini ngan paggrabe han paghimakuri han mga Pilipino, natikaklaro nga waray gud plano hi Duterte nga pugngan an pagsarang han bayrus. Waray gud malalauman an katawhan ha iya, sanglit kinahanglan nira tumapod ha ira kusog ngan pagkaurusa agud atuhan an pandemya.

Inabot na ha masobra 3 kamilyon an nahilista nga kaso han Covid-19. Utro na liwat nga tigda nga hinitaas an ihap han mga bag-o nga kaso, tikang ha masobra 200 kada adlaw hadton Disyembre ngadto ha masobra 33,000 yana nga Enero. Nasalwak na liwat ha sobra kadamo an mga pasyente ha mga ospital ngan mga laboratoryo nga naghihimo hin *testing* para ha Covid-19. Namamangpangan pa an pagsamwak han mas makatarapon nga baryant sugad han Omicron, nga gatus-gatos nga kaso na an nahilista hini nga naglabay.

Nagpapabilin nga militarista, kontra-katawhan ngan diri siyentipiko an pagbaton han rehimen Duterte ha pandemya. Hul-os nga ginsalikway han Department of Health an hilu-

agan nga *testing* ngan episyente nga *contact tracing* komo solusyon ha pandemya tungod kay diri kuno ini epektibo, bisan kun napamatud-an an epektibidad hini ha iba nga nasud ngan ha iba nga sakit. Kundi utro nga nag-imponer han mga mapan-gipit nga *lockdown*, waray basaranan nga korpyu, ngan restriksyon ha pagbiyaha, nga sigurado nga rurub-on na liwat an panginabuhin han katawhan ngan magigin pasangil para ha mas grabe nga pangabuso.

Masobra 40% pa la han populasyon an nababakunahan, ngan ginbasol ini han rehimen ha katawhan. Ha kamatuoran, tungod ini ha limitado ngan hirayo nga mga *vaccination center*, kakulang hin makurimot nga pag-eksplikar ha publiko, ngan

Susrunod nga opensiba han BHB, pagtapo ha anibersaryo han PKP

GINTAPO HAN BAGONG Hukbong Bayan (BHB) ha Western Samar hin serye han mga taktikal nga opensiba an mga adlaw tikadto ha selebrasyon han ika-53 nga anibersaryo han Partido hadin Disyembre 26, 2021. Inabot ha 11 an nagin kaswalti han mga tropa han pulis ngan militar ha mga aksyon militar han BHB-Arnulfo Ortiz Command (AOC).

Pito nga pulis ha bungto han Pinabacdao an nasamaran han ambuson hira han BHB-AOC ha Barangay Pelaon hadton Disyembre 11 dapit alas-3 han kulop. Ginpabuthan hira han mga Pula nga mangaraway samtang sakay hira han *patrol car* ngan tikadto ha pagresponde ha pagsirot han BHB-AOC kan Marlon Delmonte hiton gihapon nga adlaw. Ginpatay hi Delmonte tungod ha pagin aktibo hini komo CAFGU ngan pagpatuman hin mga kontra-rebolusyunaryo nga programa han Retooled Community Support Program o RCSP ha kabaryuhan.

Ginpanhimuwa han BHB-AOC an mga diri nagtuturupo nga pahayag han mga pulis nga magdudul-ong la hira hin materyales para ha usa nga proyekto ha Pelaon ngan magresponde hira ha mga biktima han bagyo han ambuson hira han mga Pula nga mangaraway. Kaupod ha mga nasamaran an usa nga upisyal han kapulisan ngan iba pa.

I Love PKP: Marayhak ngan mahimuon nga selebrasyon han ika-53 nga anibersaryo han Partido

Marayhak ngan mahimuon nga ginselebrar han katawhan ha Eastern Visayas an ika-53 katuig nga anibersaryo han Partido Komunista ng Pilipinas ha butnga han mga pasista nga atake ha magkalain-lain nga parte han rehiyon hadton Disyembre 26.

Marayhak an selebrasyon han usa nga yunit han BHB ha usa nga dapit han Samar kun diin nagpaskin hira hin mga sako nga mayda nakasurat nga "I Love PKP," "I Love NPA," ngan "NPA Loves You." Ha tema nga "hugot nga magkaurusa, buungon an kahadlok, umato!" gin-gamit nira an okasyon agud maghandum ha mga martir han Dolores ngan iba nga rebolusyunaryo nga martir.

Ha usa nga prente gerilya, nagsarusaruay hin mga siday, kanta, sayaw ngan mga pankultura nga pasundayag bisan kun haros pira kabulan na nga nag-ooperasyon an militar ha erya. Ginlaygay nira an magranggat nga kasaysayan han pamumuno han Partido ha ginerilya nga pakiggerra ngan an presente nga ayat ha atubangan han ginpakusog nga terorismo han rehimen US-Duterte.

Ha usa naman nga baryo, marayhak nga nagkatitirok an mga kaapi han Kabataang Makabayan agud igselebrar an aniber-

saryo han Partido. Gindun-an nira an importansya han pagkaurusa ha butnga han grabe nga krisis nga gin-aagian han katawhan. Antes hini, aktibo hira nga naglansar hin tiriklos nga produksyon ngan naghimo hin "haranang bayan" agud makatirok hin pondo para ha ira selebrasyon. Pasaro nira, kolektibo nira nga ginpamhatian an mga *audio* nga bersyon han Larab samtang nangangandam han ira mga pagkaon para ha aktibidad.

Ha norte-este nga parte han Samar, kaparte han selebrasyon an pagsaludar han mga kadaugan han masa ha butnga han mapanmuypoy nga atake ni Duterte. Iginpagawas nira an pinakasyahan nga isyu han "Bandilyo Gerilya," an lokal nga mantalaan ha erya. Ginsuma dinhi an mga taktikal nga opensiba nga ira nailansar ha bug-os nga tuig, mga kontrapyudal nga pakig-away ngan panmasa nga kampanya nga naidaug ha giya han Partido. ■

"Susrunod...", *tikang ha paypay 1*

Usa an patay ngan duha an samaran nga tropa han 46th Infantry Battalion ha ginhimo nga taktikal nga opensiba han BHB-AOC hadton Disyembre 24 dapit ala-1:30 han kulop ha Barangay Canbagic, Calbiga. Gin-gamaan han mga Pula nga mangaraway an mga sundalo nga nag-ooperasyon tikang pa hadton Disyembre 22. Ha kahadlok han militar,

ginhimo nira nga taming an mga parag-uma han Canbagic, San Mauricio ngan Bulao ngan sinakay ha masobra 20 nga motorsiklo agud talwas nga makabalik ha ira kampo.

Antes hini, ginharas han BHB-AOC an kampo han CAFGU ha Barangay Caamlongan, Calbiga hadton Disyembre 21 dapit ala-5:30 han aga. ■

"Waray tubtuban...", *tikang ha paypay 1*

kakulang han suplay han bakuna tungod kay diri ginpaprayoritisa an pagpondo hini. Gintatahuban an kapasibay-an ngan pagprayoritisa ha pagpadako han badyet han militar ngan pulis, imbes an panmalit hin mga bakuna ngan pondo para ha serbisyo pankalibugan. Nag-imponer pa hi Duterte hin mga palisiya kontra ha mga waray magpabakuna nga talapas ha tawhanon nga katungod, sugad han pagdiri ha ira nga makagawas han balay, makabiyahe, ngan magtrabaho.

Tungod ha kawarap pulos han gubyrerno, sigurado nga matikagrabe pa an pandemya. Dako an posibilidad nga matapnan hasta an masa ngan mga yunit han Bagong Hukbong Bayan ha mga erya nga ira gin-gigiusan. Kinahanglan pakusog han katawhan an ira burubligay ngan pakigbisog agud atuhan an pandemya nga Covid-19.

Kinahanglan gihapon igdemanda an dugang nga badyet para ha serbisyo pankalibugan agud mapondohan an hiluagan nga *testing*, *contact tracing* ngan pagkwarrantina, kadungan an libre ngan talwas nga pagpabakuna, komo epektibo nga pamaagi han pagpugong ha pagsamwak han bayrus.

Kinahanglan dirudiretso nga himuon an kampanya ha impormasyon hiunong ha Covid-19 ngan ha pagbakuna. Bisin kun epektibo an bakuna ha pagkontrol ha pagsamwak han bayrus, diri ini angay igpirit o gamiton nga rason para ha mas grabe nga pan-gigipit. May katungod an kada usa nga kumarawat o dumiri ha panmedikal nga serbisyo subay han ira gintutuohan.

Kinahanglan pangandaman han mga rebolusyunaryo nga pwersa an paggrabe han pandemya. Kinahanglan magburublig an organisado nga masa ha pagpatuman han mga pankalibugan nga protokol sugad han pagsul-ot hin *face mask*, *social distancing*, kalimpyuhan ngan sanitasyon, ngan pagkwarrantina, agud mapugngan an pagsamwak han bayrus ha mga komunidad. Maglansar hin panmedikal nga mga edukasyon ngan pagpahiaran ha ranggo han masa ngan hukbo. Kinahanglan dirudiretso nga pauswagon an produksyon agud magkamayda hin masustansya nga pagkaon ngan pakabuhian an katawhan ha butnga han mga *lockdown*. ■

Mga umhanan ha Las Navas, gindestroso han panganyon

UPAT NGA UMHANAN giutan han Barangay San Miguel, Las Navas ngan Barangay Hinagonoyan, Catubig an nadeostro ha terorista nga panganyon han 20th Infantry Battalion hadin naglabay nga ika-53 nga anibersaryo han Partido Komunista ng Pilipinas.

Basar ha dokumentasyon han Bagong Hukbong Bayan-Rodante Urtal Command, ginhibang han terorista nga panganyon an kalubian, mga pipita, mga utanon ngan iba pa ha umhanan han "Malubago" ngan tulo nga umhanan ha gintatawag nga erya han "Libas."

Waray pagpaid ha panginabuhin ngan katalwasan han mga parag-uma an terorista nga panganyon han 20th IB, ha katuyuanan nga hadlukon ngan puuhon an pag-ato han masa ngan ringgalon an ira selebrasyon han anibersaryo han Partido. Ginbutang hini ha peligro an mga parag-uma nga nagpapanginabuhin ha nasering nga lugar. ■

Pagkampo han militar ha mga baryo, perwisyo ha mga parag-uma

Karinggalan ha kinabuhin ngan panginabuhin han mga parag-uma ha Pinabacdao, Western Samar an dara han pagkampo ngan kampanya nga pagpasurrender han mga elemento han 46th Infantry Battalion nga naghihimo hin operasyon nga Retooled Community Support Program (RCSP). Hadin urhi nga kwarter han 2021 utro ini nga gintikangan ha mga baryo han Lawaan ngan Bugho. Syahan na nga nagin pokus han grabe nga panmilitar nga operasyon an Pinabacdao hadton 2018. Tikang hadto, pauru-utro nga nabalik an mga tropa han RCSP.

Ha Lawaan, dumiri an mga upisyal han barangay nga tugutan an mga sundalo nga magkampo ha bawbaw han ira eskoylahan. Sering nira, ibutang hini ha kadelikaduhan an mga estudyante ngan residente.

Kundi waray mamati an mga sundalo ngan, talapas ha tawha-non nga katungod ngan internasyunal nga makatawo nga balaud, nagkampo pa hira ha *barangay hall* nga aada ha butnga han baryo ngan ha mga balay han mga sibil-

yan. Pasangil nira, diri man kuno hira mag-iha ngan babantayan la nira an pagpaayad han kalsada ngadto ha baryo.

Samtang "nagbabantay," dirudiretso naman an pagsaywar, pananamok ngan panhadlok nira ha mga ordinaryo nga parag-uma agud pasurrenderon hira. Syahan na nira nga ginpatay an usa nga konsehal han Lawaan nga hi Pepito Cabrellas hadton naglabay nga Septyembre. Pabalay-balay hira nga naghimo hin interogasyon ha

Pagsabotahe han militar ha selebrasyon han anibersaryo han PKP

GINTARGET HAN DESPERASYON ngan terorismo han estado an masa nga anakbalhas ha Western Samar agud igsabotahe an ira selebrasyon han anibersaryo han Partido.

Ha adlaw mismo han anibersaryo, ginobligar han 46th Infantry Battalion an mga parag-uma nga durungan nga kumadto ha kampo han militar. Waray nira klaro nga ginplatar an ungod nga katuyuanan hini. Pag-abot han mga parag-uma, ginmanduan hira nga magbaktas ha ilarum han mapaso nga sirak han adlaw tikang ha kampo ngadto ha *auditorium*. Ginpagawas naman ini han 46th IB nga "peace rally."

"Kun batid la kami nga asya la an bubuhaton diri kami naungay," sering han usa nga nagtambong. Pasaro pa niya, mayda iba nga parag-uma nga tumambong kundi inuli dayon bisan kun diri pa human an aktibidad tungod ha kangalas.

Antes pa hini nga "peace rally," dirudiretso na an pankombat nga operasyon han pasista nga kasundaluhan ha mga barangay han Pelaon, Bugho, Magdawat, Catigawan ngan Layo han Pinabacdao; ngan mga barangay han Antol, Bulao, Canbagic, ngan Lawaan han Calbiga, Western Samar.

"Dapat unta aadto ha ira mga pamilya an mga sundalo ngan CAFGU para magpasko. Lugod, aadi pa hira ha umhanan nag-iinoperasyon," araba han usa nga parag-uma.

"Ginringgal nira an panginabuhin ngan pagsurapo han masa hini nga kapaskuhan ngan bag-o nga tuig," dugang pa han usa nga parag-uma. ■

HA KAMATUORAN

Buwa nga relief ops, pasangilan han AFP-PNP

Diri tinuod nga nag-aandam hin relief goods an mga pasista nga tropa para ha paglasurbo han bagyo nga Odette han ambuson hira han mga Pula nga mangaraway hadton Disyembre 15, 2021 ha Barangay Tarabucan, Matuguinao, Western Samar.

Ha kamatuoran, maiha na nga nag-ooperasyon ha erya an Philippine National Police-Special Action Force (PNP-SAF) kaupod an paramilitar nga grupo nga "Dos." Naserbe an Dos komo mga mersenaryo nga goons han meyor han Matuguinao nga hi Aran Boller. Nag-ooperasyon naman an PNP-SAF agud seguruhon an hiluagan nga pagmimina han mineral nga bauxite ha lugar.

Sukwahi ha black propaganda han AFP-PNP, hirayo gihapon ha sentro han barangay an ginlansar nga ambus nga porlomenos 600 kametros an kahirayo tikang ha baryo.

Nagresulta ini ha 11 nga kaswalti ha ranggo han mga pasista nga tropa kun diin unom an patay (lima nga PNP-SAF ngan usa nga membro han "Dos") ngan lima an samaran.

Sugadman, lehitimo nga operasyon isnayp an iginlansar han mga Pula nga mangaraway hadton Disyembre 21 ha Barangay Victory ngan Macarthur ha Las Navas ngan Barangay Hiyaot, Silvino Lobos, Northern Samar kun diin duha nga sundalo han 20th Infantry Battalion an napatay.

Ha Western Samar, buwa liwat an pahayag han PNP nga nagdudul-

ong kuno hira hin materyales para ha usa nga proyekto ha Barangay Pelaon, Pinabacdao han ambuson hira han BHB hadton Disyembre 11, dapit alas-3 han kulop. An tinuod, sakay hira hin patrol car komo reaksyon ha pagsirot han BHB ha usa nga elemento han CAFGU. Maiha na gihapon nga militarizado an nasering nga lugar.

Pauru-utro na la an pasangil han mga pasista nga tropa nga mayda kuno hira operasyon nga relief, nagdudulong hira hin bakuna, o maghimo hira hin ano man nga "pankauswagan" o "makatawo" nga serbisyo. Tuyo nira nga tahuban an ira panmilitar nga kapakyasan, pagawason hira komo mga biktima, ngan pakarauton an mga lehitimo nga taktikal nga opensiba han BHB. ■

"Pagkampo...", tikang ha paypay 3

tahub han waray katapusan nga "pagsensus," nga bisan an usa nga mangaranak nga burod waray papalabaya. Pauru-utro nira nga gintatarhug an mga residente nga kun mayda maraot nga mahitabo ha ira o mamatyan hira ha sulod han baryo, bubulsan nira ini hin pagpatay han parag-uma.

Saramok an dara han militar ha mga baryo. Nagpapasamwak hira hin mga hinimu-himo nga intriga ngan pagagawason nga hira an taga-ayad hini. Ginhuugay nira an pira nga residente hin irimnon agud kuhaan hira hin impormasyon. Ginbungkag an mga establisado nga asosasyon han mga parag-uma ngan gintukod an mga buwa nga asosasyon. Ginpagwardya an mga barangay tanod samtang mag-aga nag-iirignom an mga sundalo. Ginhimo liwat nga ta-

ming an mga tanod nga gintuinan han pagdul-ong ha mga tropa nga gawasulod han baryo.

Agud tahuban an ira magraot nga binuhatan ngan pakalmahon an kangkalas han masa nga parag-uma, nanhatag an mga sundalo hin sensilyo nga relief ngan tag-₱1,000 nga kwarta ha mga ginpasurender nira hadton Disyembre.

Kundi diri hini matutugbangan an perwisyo ngan pakuri nga durot han presensya han militar. Diri na makag-uma an mga parag-uma tungod ha kahadlok ha mga sundalo. Kun makakadto man hira ha uma, dalikyat la ini. Ha sobra nga kagutom ngan kakablasan,

dugang nga nagsamwak an mga kontra-sosyal nga aktibidad sugad han bulang ngan iba pa nga huygo.

Sering pa ni Tatay Celso, usa nga parag-uma, "Bisan kun pira pa nga 'ayuda' ngan kwarta an ighatag ha amon, diri hini matutugbangan an kinabuhi nga ira gin-utang, ngan sugadman an karinggalan nga gindudurot ha amon hini nga mga militar." ■

